

留春草堂詩鈔

此集為吳縣潘玉荀世文介祉舊藏文為
栴坡先生之弟與吾先公同治壬申科試
同業曾任候選訓導光緒辛卯卒年五
十二有藕花香榭吟草 壬寅月志檀記

序

昔顧華玉稱鄭少谷之爲詩也古言精思霞映天表程孟陽稱曹石倉之爲詩也清麗爲宗少谷石倉皆閩人而不溺於閩派且少谷好遊名山峻陟冥搜經時忘返便道武夷深入九曲絕糧抱病而不悔石倉具勝情闕石倉園水木清淑賓友歛集聲伎雜進享詩酒譙談之樂其風流旨趣有足稱者同年友伊君墨卿閩產也其躬際

昌期遇合較二子優矣而其爲詩及夫好遊名山具勝情較二子則無乎不同嘉慶九年自粵罷官來京師出詩草屬序余無華玉孟陽才安能序吾墨卿詩黽勉卒業大抵

少作多幽潔之篇官西曹多雍容之什居粵多峭厲之詞
溯源於溫柔敦厚託意於忠孝節廉境屢變詩亦屢變而
有不與之俱變者所謂道也少谷抑鬱終其身其門弟子
澱傳汝舟頗能傳其詩教石倉安雅尙志晚節不撓著述
甚富藝林寶重之墨卿齒未五十負經濟才詩之美且富
已如此行爲

國家倚賴爲民人悅服足跡所至必且詠歌豈得以少谷
石倉限君哉又豈得以少谷石倉之詩限君之詩哉今日
一編相對決其所以通諸政事而無負乎經濟之才者固
有在也嘉慶九年十月朔蒙古法式善撰

初湘受業伊光祿師之門師冢嗣墨卿韶齡穎秀時則有
張孟詞騰蛟齒稚於墨卿三人者志相得名相齊墨卿居
官勵節其守惠州也爲民所愛博羅之亂釀自大吏故被
譴出塞萬口號呼卒蒙

昭雪守揚州不改其素當惠揚兵災時墨卿札來曰生平
刻意學宦今所至如此命也奈何余復之曰易益用凶事
言災禍定數恃吉凶同患者匡救彌縫故聖賢者時人之
命所謂莫益或益也然墨卿終傷心引咎作詩告哀今集
中言愁最工嘉慶丁卯遂賓壬寅已來諸體詩題曰留春
草堂詩集命余序之人志事無成輒著書垂文采自見如

孟詞與余乃其人也墨卿屢典大郡吏民同聲中間玉磨
逾瑩雖不文已傳也顧詩集出論者比之鄉先正鄭善夫
謝在杭惟余行年六十塊然冷署嘗以文集請序桐城汪
稼門師師云清夫所欲托以傳者始此吾烏知此之果可
託哉悲夫悲夫然孟詞嘗撰山海精良書未成遽死將死
倩人鈔其稿如笱束亦冀後之或傳然其書旣未成墨卿
惟刻其制藝及詩制藝文體固自難存卽詩抑少耳或專
之文而不必傳或不必專而文又傳以此歎墨卿才福而
光祿師之兢兢保艾以世政事文學者可想見焉師著賜
研齋詩集久爲海內宗仰墨卿又繼之唐書藝文傳載李

適父子予知他日史當然耳故今序墨卿詩集旣歎逝者
尤自慙也嘉慶十二年春三月同里吳賢湘撰

題辭

南城曾煥賓谷

先生畱春花滿關春畱先生不出山世間何處無景物未
若草堂春意閒人不畱春春亦關衆芳容易彫春顏似聞
昔時歌舞地幾日便已蕪榛菅先生草堂三四間一木一
石常盤桓前年到惠州惠人遮道仍亟還去年到揚州揚
人攀轅未許攀昨來舟過十八灘有詩持與曾生看篙師
辛苦何時歇三歎先生警我頑頑出示灘行絕句云用盡
篙師辛苦力始知竹外草
閒庵

仁和魏成憲春松

行波箋子香姜瓦弱冠才名噪日下蒼生憂樂察眉事誰
識龔黃本終賈結言千里慰遠別投我一編揜羣雅捶琴
擊鉢徃時句少作汰餘存亦寡揚州六一惠州坡秋菊寒
泉薦芳掌封狐伏莽筆先籌肅鴈劬原淚如瀉篇篇盡是
春陵行猗玕子後繼聲者使節曾浮湘水權故園近結香
山社本之忠孝近文章能以性靈付陶冶由來餘事作詩
人字括三蒼奏九夏期君出山雲四垂老我種樹書長把
且同洗眼對西湖不覺低頭攪東野

留春草堂詩鈔目錄

卷一

古今體詩四十一首

卷二

古今體詩一百四十七首

卷三

古今體詩八十一首

卷四

古今體詩九十九首

卷五

古今體詩一百二十四首


卷六

古今體詩一百八十七首

卷七

古今體詩五十二首

留春草堂詩鈔卷一



寧化 伊秉綬 組似

玉虛洞

乾隆壬寅歲
館歸化縣作

神禹鑿山陵剝斷矜懷伎自是五丁開閼中廣所庇一線
闢瀕洞百丈裂厚地偶從物外來窺此壺中祕溜雨滴石
罅山澤乃通氣厓隙一半懸萬鈞將顛墜欲進心躊躇入
坎寧可試前驅列炬導錯愕驟驚異或如巨犴圈或如赤
象鼻或如鱣鯢額或如鴻鵠翅或平如龜覆或怪如鸞噬
桓桓立將帥絜絜陳叅貳大於垂天雲小如委盤鼓鑑澤
若漆髥溫潤若粉膩得非玉女窺毋乃神仙睡蛇行傍泉

留春堂詩集卷十
脈火滅心忽悸寒風何凜凜晨星亦哲哲攀援上空嵌始
覺天晴霽地軸真神靈喘定還睟眙奇景未能摹愧乏柳
州記

小學篇贈黃小松

易

周官教國子漢法試學僅古者六書屬小學今人嫻此誇
宏通祖龍圖籍收六國出令火急追翔風下邳再變上蔡
法漸以約易離其宗陳書北闕有馬援問奇西蜀惟揚雄
汝南祭酒生苦晚探蹟索隱憂心忡網羅凡將並倉頡博
訪賈氏還鄧酈釐爲五百四十部九千餘字開洪濛畢載
天地及神鬼山川草木兼魚蟲弼成往聖示來喆與禹治

水同膚功魏晉以來尙文藻斯道捐棄如秋蓬陽水崛起

大厯載獨窺絕學羣發蒙平生宗許復叛許二徐繼作偏

師攻其間穿鑿亦不免欲求疵類紛氈氈國朝碩彥多

講說王錢惠戴

王西莊光祿述菴侍郎兩先生錢辛楣少詹麻之州判惠定宇徵士戴東原庶常

朱君

學士竹盧先生江布衣後來稱秀更超拔黃郎江夏應

無雙從一及亥究終始偏旁部次詳增重徧搜金石辨奇

古茲謂識字生無窮篋中多蓄古器物絜絜官印炎劉銅

出其緒餘試雕刻文何顧鄭難爲工春風楊柳長安陌五

陵意氣歌相逢論文角藝一樽酒那惜街鼓鳴寥寥岐陽

獵碣至今在詰朝從子觀辟雍

留春草堂詩鈔

卷下

二

陪朱竹君先生_筠飲環溪別墅

木蘭高館搖叢竹張燈夜就水聲宿聞道誅茅宋玉居歌
衫舞扇層層綠買石晴移白嶽雲開軒曉占藍田春松筠
忍閉王給事風雨欲過何將軍年年香埃飄紫陌不知誰
主復誰客且醉山翁倒接離狂來笑問并州兒

濟寧紀遊留別楊文柱_{鍾鼃}

息羈古任城言尋唐賢迹謫仙逝千年高閣尙百尺汶泗
流湯湯鳧繹峙奕奕初日照南池恍見騎鯨客少陵遺像
存憔悴見憂國遐想二公靈俯仰情不隔揚子宏漠京東
展觀石刻突兀炫古光矗立學舍側輪囷埋厥跡河遠穿

其額東碑忠惠父魯峻博且碩北海相景君逸名頌勞績
於西表固榮面牆委門閼緬維洪都陽隸續補隸釋距今
幾百載其字愈剝蝕周鼓夙摹白嵩闕疇置驛有事先沛
林將希杏壇役是時秋正清寥天淨如拭襟袖晚涼生階
除露華滴夜飲羅長筵燭龍照翕輶我家釣龍臺烟霞本
成癖堀堞走風塵能著幾兩屐快哉金石交天涯面重覲
明發登川途逝將判南北浮雲盡日馳江水不可極旣醉
復高歌一引三大白

空江

一葉破寒綠空江澹若無占星農事晚照水道心孤歷亂

飛鷗鷺因依響稗蒲鐘聲定何處塵土夢全蘇

布被同吳清夫

賢湘

張孟詞

騰蛟

賦

布被能昭質隨予歲月深關河千里夢風雨對床心掩淚
添新絮蒙頭憶舊吟依然配長枕支漏夜沉沉

七月望日玉虛山館晨起作

元默攝提格七月忽已半炎飈頃刻收商氣應時換昨夜
更蕭條孤燈耿書案蒼蒼高桐枝北風折脩幹瀟瀟秋霖
霈浩浩春潮灌蜻蛚不敢吟鼯鼯潛奔竄我時縮重衾眼
底懸鄉閭晨集同門友一一如星散登高望邱隴邱隴杳
河漢穫稻爰先靈羣嫠寒烟爨奈何萬里旋未得躬薦盥

含悽對僮僕枯坐發長嘆

追輓連氏姊一首

生年未三十而疊觀憂危乙夜返京邸喪我大母慈去冬
省阿母踉蹌叩柴扉阿母不能言淚下如縷縻須與女甥
至三尺披齊衰見舅翻自喜問娘已不知小妹學姊妝彷彿
歸寧時嗟余寡兄弟一體從此虧憶昔傍親舍含飴分
蹲鴟三春桃李開騎竹踏臙脂姊嗔正色叱余涕還攜持
華髮與朱顏都作朝露晞古稀洵難得先祖母歿年六十九短折摧
肝脾老父函半損萬里告靈帷哭爾如女孥嫁爾非義之
貧賤殊自適柔嘉空爾爲豈不懷達觀痛爾獨無兒鬼神

重血食爾魂竟何依鄰里同慘悽非獨骨肉悲

酬林樾亭孝廉

喬蔭

別緒恍昨日勞心常怵怵繫誰照情素之子使我勞皎月
懸廣除迴風薄森條永念揮手路離離田中苗良苗旣已
藏戎菽亦已黃小人盡地力君子愛景光景光秋正高叢
桂巖香飄飛鴻一水暮緬想神理超匪曰酬嘉藻惟以論
久要久要在不忘逝登君子堂如彼邾莒國執玉朝大邦
白露濡塗塗山泉流淙淙孤館耿不寐支漏挑寒釭

附原作

炎飈扇征塵溽暑誰與浣曉經玗溪湄選勝詣山館之

子夙寤思旣覲遂申款才同賈傅少跡豈阮公誕平生
金石交屈指各星散同心憎路歧良覲恨日短卽次論
久要徘徊念鮑管

少日耽詞章黃金擲虛牝邇來抱遺經脩路改前軫三

禮姬孔留曩訓多未允陳數求其義剖析忘愚蠢成書

姑有待屬草如束筍

近著三禮陳數求義一書

夫君抱通才時輩遜

精敏願言崇樸學聖醴味無盡白頭許叔重後進足標

準

許廣文爭奇著周易名象

晨夕倘過從勝境當日引

黃生我良執

黃孝廉世發

早獲偕君遊譽君美無度茲信言

非浮君家山水縣髦俊多好脩近聞吳與張

吳孝廉賢湘張秀才

騰磊落非俗儔閉門陰處士理窟猶冥搜陰明經帶遺

榮忽已老著書誰見求孤館耿不寐月落山悠悠因君
爲問訊把臂知何由

鄒縣謁孟子祠

正氣承洙泗浩然天地間孤城滿秋色周道峙賢關功不
下神禹象真同泰山七篇言孔氏那許況雄攀

高唐州

季重心情雅好歌驂停齊右漫婆娑兒童未解絲駒曲父
老能言鳴犢河城郭南來堪畫少風烟東道覺秋多商聲
激越來林表草草津亭晚奈何

寄韓桂舫比部 對二首

幕府秋清怨。井梧銀河分。袂總模糊長。空鴈影。點星亂。永
夜角聲吹月。孤徑欲獨登。泰山頂。幾時飛集鳳。城隅朝朝
封事聽金鑰。爲訊興居好在無。

輶轡車同君弟兄

比部兄聽秋孝廉

落花時節舊心情。宛邱園內

叢芳記。彌勒龕中夜雨聲。人事茫茫催歲改。西風獵獵喚
愁生。亦知遠道思無益。其奈空齋木葉驚。

趙北口

碧水紅闌豁倦眸。直驅羸馬上滄洲。浮空靄靄雲霞曙。壓
岸蒼蒼蘆荻秋。地自燕南開廣甸。天從趙北浸寒流。幾家

烟火漁莊外香稻年年足晚收

同年陳梅垞

萬全

周蓮塘

兆基

兩編修李鳧塘中允

驥元

招遊遺光寺次韻

半灣流水起棲鴉鴈齒鱗鱗映淺沙秋浦漁閒紅葉艇晚
山僧指白雲家驂停初地塵新浣磬落中天月正華誰信
蓬壺仙島客共跌禪榻對黃花

雪夜曾賓谷農部招同曹儷笙

振鏞

盧南石

蔭溥

兩

編修劉澄齋檢討

錫五

集紫藤吟榭

荒齋三見臘前雪求友今朝稱素交酒醅寒梅初出窖人
如凍雀競歸巢茶聲細細團冰沸竹韻玲玲綴玉梢却憶

披裘十年事釣舟深夜繫江郊

夜坐寄張孟詞解元灤陽

驅暑坐暝色竹露垂空明星隨河漢轉月傍關山行踟躕
臨夏半忽已秋風生悽悽弦管心惻惻團扇情關門萬條
柳疎影從此成

夜涼不成雨明月出深碧瑤牕梧竹聲綺帳芙蓉色一葉
飄前除誰云無物役旣嗟道路長又感時節易情知愁傷
人就枕惟所適眼底榆塞懸寒蟲號永夕

種竹了喜雨

秋竹肩雲至秋窓帶雨聽一竿橫半榻幾個上空冥伴菊

隨鴻羽依桐引鳳翎暗鋪金瑣碎細作玉瓏玲團綠迷茶
臼篩陰到畫屏靜聞琴筑換涼訝雪霜經垂溜懸梢白孤
燈照夜青感時過暑假側耳數冬丁委珮和殘漏由梧憶
遠汀卷簾棋乍散欹枕酒初醒北海交文舉遼東識管寧
恭承君子意高節總亭亭

讀史六首

蕭何入咸陽但聞收版圖豈知博士官六籍宮中儲祖龍
挾書律第焚民間書棄之遺重瞳一炬三代徂秦火斷由
藥楚火連根株惜哉刀筆吏致治徒區區

叔孫通制禮多襲秦法遺去古惜未遠所得皆糠粃當時

魯兩生壯志寧詭隨死者猶未葬傷者猶未夷仁義行而效謂需百年期不謁隆準公乃遭曲學嗤陸生唱高言賈生已後時仁主憚改制誤於繇叢儀

劉項定於一魯守彈丸城偏師指城下猶聞絃誦聲嘉節葬重瞳率初仍魯名翹翹東海節絕島徵田橫詰朝見天子一劍明平生左右晨拜官夕殉同一塋更聞五百士死與泰山爭

姚賈四國使衣輕而乘肥功成讒謗興猶能殺韓非陸賈使南越讌樂名亦隨五溪苦淫潦馬革誰裹尸如何薏苡裝乃得明珠疑

裴宏射狸首文成食馬肝求仙黃帝慕遵海祖龍觀卒之
瓠子歌輪臺詔頻煩所以平準書遂次封禪篇多欲誰敢
諫獨有長孺言

簡子誤認禮僖子不識儀漢初高堂生五傳得經師瑕邱
容爲官曲臺議紛披周禮最晚出實爲太平基燃藜校未
畢歆竄希逢時逢時已違父應識將何爲徒令治術誤殃
禍蒼生罹

所思

芳草一千里瓊樓十二層所思獨不見寒雨照孤燈燕睇
愁無那夔憐病未能如何雙鳳子竹外影凌兢

湘江曲和韓桂舫

楚天風露高洞庭木葉下日暮遊子心歸帆疾於馬歸帆
洵有情秋水極天平相思無終極絲絲春草生春草復秋
草人向紅塵老明月照玉顏投簪苦不早送君洞庭水思
君洞庭山七十二峯青白雲時往還

陶然亭晚望同鮑雅堂宗人丈

之鍾

鴈排秋影沒遙天各抱鄉心望渺然半格籐猶能欸月數
行柳已不勝烟歌殘白苧人難醉採到黃花蝶亦仙莫怪
寒潭浸山骨蕭蕭蘆荻也華顛

懷古四首

洛陽有年少宣室固曾知傳與楚臣合才真天下奇飄零
投賦日痛哭上書時政體誰能達應爲絳灌疑賈長沙

武皇初策士董子褒然尊竟委諸侯相能爲六藝言學醇
過賈傳宦巧遜公孫病免膠西薦徒開東閣門董江都

臥治股肱郡條然感積薪遇災因矯詔多愆歎施仁揖作
將軍客嚴爲社稷臣帝心方侈大慙直更何人汲長孺

政漸由王氏傷心國祚移朱虛侯已往洪範論同危抗疏
匡衡詭燃藜太乙窺傳家中壘學新室歎爲師劉子政

元宵

元宵不禁執金吾火樹香車溢九衢戲盡魚龍雞報曙月

如積水馬如鳧

對酒行懷故學士竹君先生

長空歲星復大廈環材失北邙
酌詎知西州獨銜恤椒花
吟舫花欲開一日或過三四回
一飲能傾三百杯人麀人

鳳詩爲藪明月金尊此間有迴車
不揖衛將軍執簡惟箋

許祭酒及門山谷一詩孫謂武進黃仲則清才八斗長年貧話來

殘月如新月坐看今人成古人
賤子當時尙年少漫許驚

駘能遠到豈期十載長安城
路旁騏驥鹽車情有時買醉

春風陌天橋東邊樓百尺百尺
高樓柳乍黃濃雲醞雨苑

西牆武夷仙人渺何處先生自謂死當爲武夷君笛聲入破長歌狂市

人來看狂生醉那知獨立蒼茫意天上琅函玉檢泥腰間
寶劍春坊字嗚呼生不成名知己死腸斷朱門雙燕子

題謝浣雲尊畫

松頂樓牕縹緲開浮嵐都共水潌洞知他筆快如風雨幾
許沉吟作勢來

上宗伯師紀先生

虎坊橋北龍門高秋霽月霽明松梢斜街學士已黃土

謂作

君朱先生好士公卿誰復古河間宗伯今扶風劉畧班荻填胸

中北極宏文開四庫西清巨手邀

天顧大典觀成

昭代編高名將與天漢懸詩篇流播繡轡輶扶餘 貢使
覘儀狀唾生珠玉典風騷履聽星辰踐斗杓織錦千花同
燦爛翔鸞百鳥爭啁啾公之門牆盡桃李却賞枯桐到焦
尾六書夙嗜微舊聞爲言大戴清無倫每稱東原許氏遺書承賈逵學歐九要與劉攽羣閱微草堂一尊酒子雲不礙
懸河口生來隻手刃摩天幾輩十年文覆瓿公才自是應
時興扶輿積秀瀛莫精都俞從古兼吁咈願獻昌言佐
太平

白茶花二首

清極本無色移根茗鬪初芳情粉署外禪味趙州餘叔寶

譽何愧相如病未除瑩然對良夜寒露半牕虛

澹泊竹爐興鄰梅氣轉芬一花開雪後孤月照宵分歲晏

玉人至

花從粵來

天高白鴈聞幽芳勵清節知貢武夷君

題羅兩峯

聘

鬼趣圖二首

慧劍銛時善眼開女青初不說輪迴如何畫鬼成滋味似
向壺中騎竹來

過眼雲烟事總非問誰弱喪竟忘歸祇今卷裏題詩客半
化城頭丁令威

留春草堂詩鈔卷二

寧化 伊秉綬 組似

夜雨宿西省

畫省青綾擁宿醒
感人節物不勝情
春榆鑽火逢寒食
暮雨如絲闇禁城
幾處樓臺迷遠夢
誰家簫管咽新聲
年來最有田園興
三寸泥應叱犢耕

同馬秋葯

履泰

孫淵如

星衍

兩曹長過高梁橋

晴挈青絲出郭遊
吏情終是戀滄洲
高花臨水如含笑
細管當樓未解愁
巖翠都從杯底落
湖雲只似鏡中流
班駘不肯忙歸去
喚老東風是粟留

同年讌集庶常館見招以直宿省中未得往賦謝
彌勒都來共一龕寒梅出窖麝盈甌玉堂春酒傳天上良
夜名香熟海南故業班書兼鄭注新詞陳七與秦三應憐
手板雲司暮刺促勞於作繭蠶

書齋四詠同孟詞賦

端硯

一片雲根水氣侵昆刀切玉想千尋磨人自是同磨墨正
筆應知在正心華省玉繩搜句迴秋堂銀燭卷幃深朝朝
手板聽霜鼓難得芸牕徑寸陰

燈隱

剪圓紙揭之以
蔽明謂之燈隱

用晦心情掩更熒半遮蘭焰恍雲屏伴幃最近江都席如
月常從太乙星人醉春醪書共綠案排冬史眼同青觀來
卓犖仍無障暫撤頻挑驟雨聽

印章

小印鈴當息管城重看書就更吟成休疑子墨無徵信也
借將軍記姓名藏到炎劉銅已少摹來繆篆筆逾精何須
雕飾誇良玉文石離離最有情

界尺

寸木堅貞槩几陳型能填物靜宜人臣謨畫一蕭何重士
品端方石介倫直道如弦消反側細闌摹繭轉停勻若教

削玉同圭鎮寶氣真看席上珍

時帆學士

法式善

招己亥同年讌集陶然亭二首

年光如水判流東
萃鹿聞歌似夢中
四海人來聯舊譜
一亭山好坐西風
蘆花傷渚搖空碧
楓葉穿雲露晚紅
共是五更聽鼓客
蕭齋難得一樽同

山似秋雲抱郭飛
煙鳧漠漠赴柴扉
看花最憶元都觀
走馬猶疑慘綠衣
我輩酒懷殊卓犖
雨餘天氣漸霏微
若尋簪帽當年桂
聞道蒼蒼已十圍

庚戌元日

賜宴

保和殿隨侍家大人趨赴恭紀

聖主元正

錫福時老臣叨宴小臣隨醴醕

舜酒榮三酌奠莢

堯階燦一枝班合東西瞻樂舞拜分前後肅朝儀嵩呼

共祝

無量壽飽煦春陽下玉墀

送高麗朴檢書

齊家歸國

扶桑東海水楊柳春風城上國花開讌遙天月伴行文能
通繹語詩解繼吾聲欲訪遺書在悠悠箕子情

寄同年楊荔裳舍人

集

微省雲司並作郎風流誰似下
汭楊聽鶯直向棲鸞地走
馬歸從解玉坊絳雪經秋顏自好
紫蘭邀月話方長如何
絕塞籌神筆磨盾書懸鴈背霜

答賓谷問病

掃除方丈室不奈病維摩
細雨密如此雜花開更多
鼠肝從物化駒影閱春過
尺素同芳訊衝風到薜蘿

病起

病聞桃李滿園開病起憑闌祇綠苔
春事爭如流水去芳情眞作散花回
驪歌未足供陶寫藥餌還須費剪裁
比似城西張十一霜縑九咏愧無才

喜孟詞自皖城至都

細雨江城望若何程隨歸鴈未蹉跎三年綠鬢看非昔一
晤青衫淚轉多花底聯吟先貰酒月中密坐又聞歌不妨
重作東華夢解挽醍醐灌頂河

送同年梅岑檢討

達林

奉使西域二首

涼州西去萬重山鴻鵠高飛雉子斑珥筆詞臣秋出塞櫜
弓都護夜臨關風吹白草霜千里天接黃沙月一彎羌管
未妨聽野戍班生三十好容顏

軍門初日照牙旗綠酒紅燈又一時萬里功名覘燕領三
霄侍從本蛾眉秋風牧馬過宛迹春雨屯田試趙菑倘振

軍威勤遠畧裴岑先勒紀功碑

爲魏春松曹長

成憲

題溪山二隱圖三首

銀漢耿遙夜白露紛前庭萬籟一以寂寥寥孤鴻征短檠
伴竹素見此二隱情借問二隱誰令弟同哲兄對床戀風
雨執簡懷鵲鴒本期黃髮俱疇知中道更越溪盡日流秦
亭終古青草堂故無恙移至慚山靈

倦鳥知惜翰逸駟難絕朝晦迹金馬門其名曰通隱休沐
閒盆廬齋研田日勤墾寸心泊無營千載乃獨閔抗志青
雲端齊物忘遠近葭蒼倘招子毋庸改前軫

故園讀書處亦在山水間彫胡實可炊桂樹馨可攀出山

匪云久十見叢菊殘竹林吾最少邇來鬢已班團團秋月
明曾照河干檀至今夢中游流水迷灣環感君友于情徙
倚空長嘆

題同年程任齋

卓樸

明府秋燈課子圖

啼鳥啞啞枝上啼霜高月落秋堂低素帷頻動風慘悽一
雛牀東一雛西孤燈分授禮興詩瓶瓶顧影頓且鰲當窓
軋軋理杼機機聲書聲驚鄰鷄鄰鷄喔喔年復月章編雖
絕字不滅謂是先人手澤存況有慈親眼中血一雛須與
化鳳凰其儀五色鳴朝陽作圖猶寫秋夜長吁嗟乎仁人
之粟親可嘗孤燈之苦心難忘不見莎庭判訟秋漏永蟲

聲切切移近床

時帆學士招同汪劍潭助教

端光

何蘭士水部

道生

羅兩峯山人小集詩龕兩峯作圖

駿馬儕曙鴉飛上淨業湖湖邊積冰雪幽人此結廬朔風
日以嚴秋林日以疎古人旣長往今歲行將徂而我復不
飲來者安知予南榮曝背暖西山聳骨癯嘉會惜斜陽臨
去還踟躕作圖示後人千載同須臾

人曰讌集次梁九山編修

上國

韻

九門鶯語送芳風靈瑣韶光麗碧空尊酒論文東觀共新
詩求友蜀州同鏡中鬚鬢看長綠燈裏魚龍試舊紅更向

曲江拚一醉春流活活泛鳬翁

爲龔海峯明府

景瀚

題載書圖二首

卒業猶思寫禮堂春風冉冉惜流光閉門孫敬勤兼癖入
市王充喜欲狂繡悅幾曾能補袞汗牛誰復歎亡羊盧溝
橋畔驅車過早有靈威護道旁

集賢院與太清樓宋本攜將作遠遊萬里川原多考志三
年栗馬已成謳歸田預擬曹倉貯涉渭還同米舫浮只恐
購來餘祿少賣舡倒篋未能酬

哭孟詞二首

人負鳳麟望時當桃李春更誰於我厚偏喪所交親狼籍

書堆案滂沱淚漬茵凌晨理青鬢應見二毛新

執手彌留際心宣更目成亮爲雛鳳計竟失老蛟精

孟詞家近

蛟湖大興朱師戲呼爲老蛟精自古妨才命來生訂弟兄英靈如不散肯

示雨風檠

題張水屋刺史

道渥

畫冊送高麗金履度歸國

吳中山水天下無十年不見心縈紆繫誰導我江干路眼
前漠漠飛烟鳧推篷曾看山數尺怪底羣峯羅一冊絕頂
纔鋪莎薦青半天却挂泉紳碧前山雄峙偉丈夫後山竊
窕如吳姝精靈彷彿照江水筆墨化作雲模糊誰能寫此
石谷子百餘年來張刺史倪迂范緩元章顛由來絕藝非

偶然春風誅蕩天門闢句驪 貢使來重譯偶因邂逅聚
浮漚折角巾烏練裙白送憐晁監太匆匆贈惜張顥點筆
工不信醫巫閭下過臥遊還看吳江楓青陰逸韻留茶屋
朱蒙風景畫不足桃花箕子墓前紅芳草檀君祠下綠君
歸勝日集詞人貞蕤居士知情親朴齊家檢書言瞻刺史不可
見披圖題遍江南春

總裁鐵冶亭先生招同同年胡脩撰長齡張編脩錦

芳李編脩鈞簡王吏部寧焯錢戶部楷極樂寺訪桂

次韻

南宮富休暇車騎此暫淹佛閣倚晴空山色青入簾坐覺

雙眼豁如試金鑊銛遙望孤雲飛縹緲千峯尖意愜神俱
往境靜心亦恬愛此塵外景清籟猶江南不緣限城闕徑
待觀銀蟾北地少巖桂艱致如鰈鶻誰知郭橐菟迺屬僧
道潛遂令微妙音香界宣華嚴吾師示新句當仁戒毋謙
諸生誰昌黎不對宣公慙且喜誦萬遍食蜜中邊甜或證
聲聞果智慧從茲添

俞貞女詩

貞女姓俞氏無錫人孝廉坊之妹能詩善畫許字
高郵明經金蘭歸有日矣夫暴病卒貞女殉之遂
合葬焉

春秋特褒宋伯姬大書納幣公孫來譔譔出出災老嫠書
卒書葬其義垂奈何左氏謬是非昔劉原父曾致譏女而
不婦猶然疑婦而不女能無喟問名已徃身屬誰許人以
身死背馳禮雖從父心則違恒其德貞女伯夷梁溪惠山
清且奇七十二泉明秋漪篤生貞女年及笄良人教習鑲
藍旗占歸妹吉乃死期手寫女貞木一枝丙舍連理冬不
萎吾聞王化始深閨宜付史館揚芳蕤金俞二姓寧得私
又聞臣道同乎妻凡百君子敬聽之

歲暮次王鐵夫孝廉

芭孫

韻二首

好是金剛不壞身高堂寒盡又逢春諸曹封印閒彌月鄰

寺聞鐘省向晨夢到烟霞原有癖用饒文史未全貧屠蘇
餞臘煤燒炕恰對寒梅一朵新

門外常停長者車坡爭上下付軒渠喜因介壽春爲酒偶

學齋心夜廢書

內帑頒金殘歲度

有各借

詔京官俸半年

中庭積

雪小山如明年觴詠從頭數肯使花朝月夕虛

夜半

夜半明月斜粉牆畫松竹酒病上樓蘇鐘聲滿江綠

雜題法帖和王鐵夫十六首

剪桐並建思周室舉電長驅頌晉祠真氣千秋誰得似欲

摹曹喜大風碑

晉祠記

九宮皆到古曾無視晉風流格畧殊奇絕鴻文兼妙翰魏

公斌媚率更癯

醴泉銘

鴈塔東西石對龕最先奉詔褚河南一從集腋成裘後誰

識抽絲獨繭蠶

聖教序

斷闕曾聞天順初山陰嫡嗣想真如收藏不解孫承澤拾

唾猶譏院體書

集王聖教

褚虞蘊藉足風姿歐柳開張骨相奇本是一原分兩派伯

施親見永禪師

夫子廟堂碑

歐虞褚繼定非凡各有名書巨石剗少保遺蹤真僅見昇

仙碑後半題銜

昇仙碑

薛書除此碑題銜數行他無碑版

留春草堂詩鈔

卷二

九

雲麾神道極哀榮典禮良弓概一生諱藝豈惟閭立本將

軍亦隱畫師名

雲麾碑

牘尾脩書氣激昂居然龍虎欲騰驤郭公未攷名英父幾

使汾陽襲定襄

爭座帖

僧院看花待月明錄茶譜荔亦多情洛陽橋在雲霞裡別

有豐碑壓蔡京

古香齋帖

元祐孤忠寒食詩臨書常感禁書時何須肥瘦論工拙公

是天人不受羈

東坡帖

一讀摩崖泛畫船肇巢字繼魯公傳蕭蕭清比霜天竹猶

道稱尊無佛前

山谷中興碑跋

詣極無如顏魯公無邊法力米南宮丹砂變粟真游戲枉

逐刀圭失正宗

元章帖

定州得石揚州失蟹爪沉淪六百年金井虹光傳潁上猶

能夜夜氣冲天

潁上蘭亭

琢成鴻寶夢猶甘望古應無誓墓慙可奈相公眞賞鑒半

閒沉醉髮毵毵

玉枕蘭亭

松雪書原宗北海漁洋詩亦祖滄溟卽看射虎騎鯨客化

作驚鴻洛水靈

松雪帖

入山陰室董華亭追配吳興尙典型晚歲一篇成道記夕

陽芳草墨花零

香光帖

微雨郊行和陶鳧鄉秀才櫟二首

涓涓新綠散汀烟，又釀輕寒細雨天。
送客情如酩酊後，惱人春似綺羅年。
粉垣慵珥花間筆，烏帽頻揮柳外鞭。
獨有維摩方丈室，爐香枕茗伴孤眠。

時桂舫臥病

城南杜曲馬逶遲，顧客牆頭杏一枝。
上已鶯花愁月隱，中年絲竹恐人知。
居鄰畢卓宜開甕，情昵陶潛喜和詩。
依舊萋萋芳草路，短長亭子夢歸時。

題子陵垂釣圖

廿八雲臺將誰從，畫裏看荒臺終古在。
五月一裘寒山鳥，聲如筑江花目以蘭舟行。
清絕處我欲老漁竿。

題洪稚存編脩

亮吉

寒檠永慕圖

君不見雲溪老漁愁起遲中宵恒與書聲期書聲隱隱出
何處一燈如豆隔江霧其中軋軋機杼聲秋堂風露慈母
情長者機絲短者檠孤兒獨學何時成太乙吹藜窺著作
卷施閣移天祿閣丹鳳城頭烏夜啼夢迴返哺情如昨昔
也檠短今檠長一圖再圖安可忘知君持節黔江上曉聽
漁歌猶斷腸

同桂未谷進士

張

船山檢討

問陶

夜訪陳笠帆曹

長

預

小酌

晚涼同盼雨踈磬落生烟忽報月初上因知人未眠燈光

深竹裏夜氣小山前洗盞留斟酌閒論種樹篇

鐵夫藏劉石菴相國自書詩一卷

麝煤麈尾伴年年展卷名香一辦傳勁節因裁爭座帖古
風兼愛陝郊篇西清筆潤三霄露左海峯開五朶蓮我亦
藏公詩句在亟須勤爲後人編

七夕雨中同洪稚存編脩趙味辛舍人

懷玉

張舩山

檢討宿吳穀人侍讀

錫麒

澄懷園直廬三首

五人七夕澄懷宿別緒秋心落水雲薄醉未成慵就枕亂
蟬聲襍雨聲聞

蔚藍天映濯龍低霽入黃昏曉晚迷未必魚知莊叟樂攀

荷爭戲葉東西

和存船山酬後失足落池

萬荷花氣透牕紗臥看銀河一道斜雨歇蟲聲鳴到曉地

鄰

禁籞夢山家

黃昏

轍向黃昏息勞薪暫得安劇憐三徑小頗覺一身寬暮色

蘼蕪碧秋聲蟋蟀寒殘書堆案久聊爾點燈看

查小山郎中

有所

招同張亥白孝廉

問安

船山檢討

兄弟遊金氏廢園四首

羸驂不識翹材館尺五荒園屢往還猶記鶯花迷杜曲依

然水竹似江關鷗飛白點橫塘外蟬噪涼生暮靄間回首
右安門入畫女牆低處一痕山

池臺休問故尙書不見門填七寶車畫本倪家最蕭瑟吏
情嵇氏也龔疏粉垣繡錯滋苔古紅檻欹斜漾水虛鐘漏
欲殘歌舞散泥人風月尙徐徐

秋筠戛玉幾聲寒移榻當軒鎮日看賴有故人來醉客那
堪走馬去應官眠溪老樹枝猶健聽雨枯荷葉未殘白鷺
似知晞客意相隨閒立釣漁灘

曩遊如夢午陰晴留得西風萬木生竹葉乍濃人酩酊蘆
花初白月空明每當塞北盤鷹候輒動淮南訪桂情堪笑

年年叨廩祿買山賒望幾時成

家大人蒙

恩與千叟寡扶掖趨 朝恭紀一首

三十藩國三萬里來朝

九旬聖天子

天子兼文武聖神自日之出如天仁四庫全書 七閣陳

五代同堂

五福臻石經石鼓垂貞珉

武功十全圖功臣熙熙皞皞樂哉民六十一年歲丙辰元

正

勲

華授受親以

聖繼

聖前無倫卿雲復旦

皇極殿皤皤千叟重開宴臣父謝病居京縣卿班暮齒猶

叨

眷許聽 仙樂嘗 御膳載蒙

錫予蕃難算就中尤寶 上方硯手持靈壽身已健追隨
王洪葛錢羨辭朝一步一瞻戀於維

太上恩高厚

皇帝大孝作

元后五蠲正供福九有百歲建坊爵黃耆力田孝弟勞牛
酒開科登俊頒薪樵千官嵩呼九叩首臣朝棟率臣秉綬
臣聞至誠能悠久合千叟壽爲

聖壽

奉送侍郎王述菴先生起赴千叟宴歸二首

海內論耆舊思公江水長重來文潞國又見魯靈光
錫宴春生杖談經月引觴悠悠三泖路歸夢落漁莊
白髮短檠伴因知風雨勤九書宗鄭學六體辨甄文裙屐
瞻前輩關山話舊聞乞言能幾許晚晚惜斜曛

柳

一夜東君染乍齊
舞風無力苑牆西
憶過寒食橫塘路
樓外微黃送馬蹄

雨牕曹長

阿林保

招同吳穀人侍讀石琢堂脩撰

韞

玉小集適園

我是高陽舊酒徒
醉來步履倩人扶
綺疏似坐烟波舫
佳士同披主客圖
四面芸香推武庫
一春花事到文無
朝回過此休嫌數
陶寫方須絲竹娛

送桂未谷之官滇南

拋却氍毹青綰綬
黃別君那惜醉千場
也知判牘心如水
其

奈譚經鬢有霜極北星文占鳥道博南山勢界蠻荒部民
自古傳忠義草檄功曹最擅長

爲桂未谷題戴花騎象圖

猩猩啼雨瀾滄暮夕陽明滅花深處金鉦雙導宰官來嗟
峨騎出千人哈昔聞馴雉今馴象行春顧盼南蠻長夙學
三倉爾正書據鞍拍手吟呶唔獠童吹笙歌且舞宰官亦
解爲蠻語飄蕭短髮還簪花蠻花無名壓鬢斜

題金手山秀才

學蓮

畫蘭竹

介言石幽言蘭此君獨上青雲端芳馨滿抱金手山贈人
一枝青琅玕植節胸中富千畝工騷筆底畹滋九日暮瀟

湘烟雨愁紛紛吹落手山手百年茲事誰最工板橋道人
籀石翁昔人已往空遺墨季子今猶遠京國吳白庵嘗
爲予寫竹不見荒齋夏日寒霜筠勢欲裁千尺有如鄙性孤且直

題湖山歸養圖送吳穀人侍讀假歸

詞臣直講到 三天一疏陳情啟別筵細雨金尊寒食夜
垂楊烏榜潞河烟採蘭欲補循陔句種秫先求負郭田共
說

君恩似湖水春波浩蕩泛家全

東風行送陳肖生山人嵩歸揚州

東風吹蝶南園飛城南韋杜春霏微小樓一夜五色雨天

桃欲放丁香肥此時美酒斗十千此時遊俠多少年金勒
馬嘶榆莢路隔牆花影搖鞦韆絲絲楊柳萋萋草獨有王
孫思遠道遠道棲遲二十年人歸却比春歸早竹西歌吹
水雲空蘅北樓臺烟雨中君歸此日足可惜畫裏花枝見
顏色

題田山薑先生大通秋泛卷

田郎招客一樽酒勝事流傳幾重九披圖笑倒江南人牽
船百丈雙驢走山雲壓船船不動滿船豪翰吟如聞是時
漢水躔妖星轉輪百萬之襄荆

田詩及征吳三桂事

大兵遂令杜甫

漢陂興更縈元結春陵情倉曹職司會計耳仁人用心乃

如此只今延賞到吾儕沅湘兵甲亦可懷

湖南逆苗
尙稽顯戮

四海

櫜弓歸禹貢七旬舞羽先

堯階致身廊廟多稷契且盡一杯對秋月

題朱竹垞先生煙雨歸耕卷

雲中古戍南海水宰相世系落泥滓館人不識馬周才緣
督爲經良有以春深夜雨田園蕪荷鋤歸夢鶯鶯湖湖邊
蕭蕭萬竿竹却無百畝驅黃犢有田穫稻一家足無田著
書千載讀名兒掌穀孫稻孫明年攜爾趨金門金門又有
江湖思一釣長蘆烟雨昏

爲友人題春水居圖

獨向鷺湖住夫君神理超幾株松蓋屋一夜水平橋翠愛
嵐光潑紅知燭影搖道書如肯借早晚趁吳潮

夜雨和洪稚存編修

一雨無朝夕秋牕莽莽寒燈昏頻掣電溜響漸成湍白屋
誅茅歎青天轉粟難惟應洗兵馬送喜到長安

附原作

一夜瀟瀟雨開門水倒流亂雲穿斗拱野鳥宿簾鉤兵
甲真堪洗櫓槍尚未休似聞宵旰慮仍在益梁州

香山散直同趙味辛舍人遊臥佛寺

西嶺碧雲暮踈鐘翠壑隈佛從何代臥人自九天來古色

生寒澗秋聲落講臺重陽已昨日登眺漫徘徊

宿海淀直廬寄故鄉謝浣雲陰青原吳清夫諸友

禁鐘寒帶隴雲飛如豆疎燈伴粉闌九月清霜天上直千
山黃葉夢中歸近牀切切秋蟲語遠道絲絲夜鶴譏爲報
妖星躔漢水吳鉤頻撫壯心違

送友人之官丹陽丞

作吏隨秋鴈流聲江水清
躔陪袁粲尹猶是呂蒙城判牘
庭莎碧觀魚檻鏡明報書知
敏妙朝暮故人情

洪稚存招同人祭詩

歲云暮矣曜靈奔賴有詩篇計日存幾句能傳心一寸殘

宵聊慰酒盈尊衣冠華燭真成拜風雨孤村早閉門一笑
雕蟲何所用舉觴酌劍好酌恩

方茶山曹長體移居

買山賒望總蹉跎只合尋君踏碧莎如此名園朝士少莫
嫌佳日酒人多庭空四面攤書畫樹老通身長薜蘿纔擬
送窮先潤屋不知家具果如何

過澄懷園贈周駕堂編修厚轅

古藤曾訪子雲居又覓仙蹤到直廬坐對烟嵐聽刻漏頻
看鳥雀下堦除清齋虛負千鍾酒素業終成七畧書花影
漸移樓影直定知朝士午迴車

黃小松司馬拓嵩陽三闕文寄蘇齋索題

嵩高維嶽神所都祕文奇字無處無巍峩三闕亘相望風

雨出沒雲模糊當時歐趙未到處則有董叟披榛燕

董相
西字

金亭林

顧空山

牛

競著錄約畧作記編爲圖黃君更欲探

靈迹凌寒冒雪膏輜車攀援幽險苦搜剔瓊蠟在手水生

鬚馳將束筍入京國盡以所得誇吾徒蘇齋忽變嵩陽觀

憑空列嶂分郭郭太室齊楚自雄長少室朝拱如滕邾一

闕西踰小峩嶺陽城六篆誰與書中排分隸字盈寸旁立

冠冕人執笏一闕開毋獨乏額堂谿禱雨羣靈趨上辨維

時下嘉字首行拓補千峯摹一闕神道表少室刻畫人物

紛睢盱或獵猛獸鞭龍象或戲角觝撞都盧月規流量開
石鏡搗葯蟾兔明雙矚何期妙緒空中闢衆山響應狂歡
呼叢林芝下向無拓露一伊字審不誣北平學士翁覃溪先生方
綱爲摹研笑謂此字應歸余褚書龕名揭伊闕史記鄉號
懷伊廬磨墨兼訪衡方碣吾宗之良均範模衡方碑稱與伊同祖秦
相已遠祭酒逝漢篆零落眞瓊琚北平鉅筆追盛漢一字
堪敵百車渠始知三闕盡完整脰以季度垂寰區二千餘
載蝕不朽延光更溯元初初黃君嗜古有誰匹歸裝飽壓
牛腰麤嗤余半世看墨本幾時躡屐輾轅紆坐臥三闕三
晝夜墨華呼吸神清腴適來舊雨虛堂靜載得明月中峯

孤黃君餉我良不啻研田況復勤畬畝嵩陽居士照青眼
使我夢想同君謨

京師蒔花人以時送花立券而取其值馬秋菊名之
曰花券各紀以詩

花信更番到五都裁爲傳別買名姝短箋畧似羣芳譜左
驗還同調水符香色清齋論歲月文章薤花剪榛蕪東風
吹動揮毫興一笑曾書博士驢

送洪稚存編修假歸

君不見琉璃井黃塵遠市車聲靜君不見澄懷園紅樓隔
水花枝繁披星直講 三天上退朝日未容踈放手編七

畧寫三倉一時仙侶誰能抗承

恩如此忍言歸停觴使我中心違洪君別我詞慘悽鵲鴿
原上風雨飛難兄奇才斗能戴荊花乍謝兩龔對當日孤
燈雙哺雛傷心更有先墳在去去情知不可留洪君洪君
能記不七夕殘荷聞雨醒中秋明月聽琴愁春風走馬城
南路贊公房內題詩處賞雪西山瘦骨肥祭詩小閣寒雲
暮今人坐惜古人哀翰林歐九都官梅白日西沉水東去
落花飛絮空莓苔

扈從過清河

北原靈時望如霞萬騎雲屯擁

翠華肅肅周廬聯鷺羽迢迢關樹接龍沙
山容莽蒼晴兼雨野色青黃整復斜
夾道嵩呼誇盛事

九旬天子問桑麻

密雲縣

古縣庠奚漢代開潮河西走勢轟雷
山橫絕塞疑無路石疊中流尙有臺
天險兩朝爭界畫雄才百戰剩蒿萊
神泉門戶陶唐俗牛酒歡迎

玉輦來

夜渡白河

執戟朝隨豹尾過偶然卽次向巖阿
記將明月檀州夕

榆影蕭蕭入白河

九松嶺

登程西日落邊峯匹馬三關紫翠重流水不停雲欲暝一僧枯坐九株松

長城謠

駿馬嘶不行仰見秦時城此城亦何異而挾嬴秦名廣礪山勢雄且奇秦城蜿蜒繚繞之其色非黃非赤堅於鐵中有築城吏卒血農夫耕地得怪石恐是役夫所化骨下有廣礪水源自黑峪清見底良苗映水何青青還見秦城礪嶠形當時堪笑始皇帝萬里築城延二世二世不再延此

城千萬年

常山峪遇雨

一角烏雲障幕昏清塵急雨出山根迴風驟濕

宮前路夕照猶明嶺外邨望慰三農滋地利聲驅萬馬下

天門

南天門地名

來朝試認谿間路舊漲新添幾尺痕

石匣

地險有如此興衰憶往時金溝荒館驛石匣古城基走馬
憐詞客呼鷹愛健兒琵琶明月夜一起故園思

牆子嶺

古戍列霄漢其崇何代牆春屯邊草綠秋獮塞雲黃斑駁

尊鼎色陰森虎豹藏年年諸部落琛寶此來王

黃土梁

曉行沙巖露空翠沾人衣林禽尙未鳴澗道琴聲微不知
身已高但覺羣峯卑羣峯澹如墨一縷雲氣飛倏然漲成
海萬頃都迷離誰削青芙蓉萬壑開朝暉

青石梁

小石碍行脚大石觸面削駿馬駐鬣風長嘶驚錯愕其前
臨絕嶂刻劃象郭郭厥後布碁局了了見村落天宇莽曠
蕩地軸通橐籥探幽步步殊決皆人人各奇賞心目勞禪
關叩寂寞

廣仁嶺

千盤蝨處禪一線蟻緣垤嶺橫疊嶂開險自何年設石膚
溜雨滑戰慄置蹄鐵躡躡平生心却曲苦折節仰首得孤
亭引我如提挈奇石虎豹伺環岫兒孫列上有極天松下
有太古雪凜凜夏晝寒河水乃名熱

晚直東潘理齋編修

世璜

韓桂舫曹長

莫厭泉聲破午眠鳴珂濟濟肅班聯風迴蘭薄收殘雨日
駐楸枰識小年太液好賡黃鵠唱鈞陳還檢白雲篇不知
人世愁蒸暑上界先秋已爽然

入古北口作

奉

湖南試

命副錢

編修

福祚

典

乃行

甌脫當今屬一家中原山枕北庭斜三關通道來琛賚諸
衛連營競鼓笳夜燭女牆秦塞月

恩流子舍漢江槎自慙幼忝趨庭學漫向蟾宮植桂花

送吳少甫吏部

掛萱

典試粵西二首

才華小宋壓名流慣泛仙槎犯斗牛玉壘浮雲成舊夢
會視蜀學桂林明月又中秋芙蓉江上歌移舫楊柳風前笛倚
樓曾是采芳湘浦客渚宮重過不勝愁

後車亦奉

詔書馳忝躡前蹤見面遲相隔星沙纔幾驛各持玉尺未
旬時以君蛋雨蠻烟夕知我蒼葭白露思更有故人居塞

北聽殘羌管望天涯

謂韓桂船

積水潭爲明茶陵李文正故居時帆祭酒邀同人觀
荷餞予之湖南并出茶陵畫像索題

荷香懷麓草堂前葉葉花開一樣圓三百年同雲水夢四
千路結荳蘭綠懸來像似城頭鶴有盡觴聽柳外蟬他日
弔公湘浦夕數聲瑤瑟出江烟

自琉璃河夜行至涿州

黃昏十里琉璃堤河流如箭湍沙泥驂騑踏鐵石齒齒葭
莢嘯雨風淒淒寸腸饑餓重僕困滿街燈火牛羊歸王
程記里迫清夜乍前欲却心狐疑暝山羃雲那可見雨月

浣鏡來相窺有時流潦橫路側坐覺白露沾人衣初登岡
巒極曠邈亦踏澗石窮烟霏孤蟬聲咽戍鼓斷百蟲響和
流泉微尋常邨落盡瑤島叢雜竹樹皆瓊枝此時暑溽恍
秋淨使我心悚寒生肌月臨中天虹跨水迎人列炬分清
輝四更斗轉萬戶寂嚴城魚鑰開雙扉嗒然對案不能食
心知塵境若有違

劉伶墓

酒星忽在地飲者留其名礪草芳長臥山花色帶酹千秋
還我輩一鍤是平生欲約高陽侶來揮寒食觥

順德謁魏宋兩文貞公祠

我行指襄國旣雨禾芄芄龍岡渺何處鵲山殊未逢道瞻
斥堠邇城據坡陀雄式里欽名賢吾愛鉅鹿公一鑒照黃
屋十思陳丹衷廣平佐中興治幾貞觀同當其未遇時作
賦含清風天生鐵石心配此嫵媚容竭來拜祠宇爰諮到
村農荒涼弔石獸盤桓倚孤松愧乏蘋藻篇勗以非貌恭

臨洛關題壁

關勢窺全趙河源下太行遏流雲駢驅暑雨蒼涼柳葉
垂天碧槐華滿地黃只今誰好士小坐說原嘗

車騎關

朝登車騎關路長一騎直上神飛揚輪蹄礪硤疲且僵高

岡之阻如太行邯鄲北枕烟茫茫井陘東挾山蒼蒼下馬
四顧心徬徨古來用武茲巖疆石如鳥卵填路旁居民用
以爲堵牆餽餼欲煮充餼糧夾道蕭蕭多白楊陰雖可藉
聲淒涼疾馳快馬來滏陽堤栽榆柳田麻桑到城流水荷
花香

渡淇水

纔濕檐帷雨似烟晚晴佳氣到淇泉隔溪葦當千竿竹疊
石橋閒一葉船恍應和鸞聲激激欲沾襟袖色娟娟言尋
衛女裁詩意涼月新秋掛遠天

滎澤渡河

洪河終古勢崩奔鄭衛中分禹跡存流視兩丸跳日月源
聞一曲下崑崙濤聲暮走鴻溝界野色秋高廣武原誰爲
國家籌濬滸更無脩竹滿淇園

朗陵道中次錢文端公韻示雲巖編脩公之孫也

迎人嵐翠出深烟回首孤城夕照邊山縣古名傳盛漢江
鄉清景似由拳數團螺髻雲開岫百疊僧衣水界田詒穀

皇華留詠在玉堂徵典合編年

詩爲文端雍正己酉典試湖南時賦

渡淮寄扈從諸友

山禽一路叫鉤輅細雨如絲到郢州人鏡淮清餐竹翠却
思天入塞垣秋

信陽道中微雨竟日

層層郢門山漠漠淮津霧咫尺不見人濃墨點烟樹好風
將雨吹如塵復如絲不愁嘲御叔頗愛沾人衣一盤還一
曲野水縈秋竹有時瞻鷺明終日飲山綠英英木槿花林
罅枝天斜郵亭欹曲磴江路繞平沙沙平映江白蘭草參
差碧誰知使者星本是看山客山原無定姿雨亦無休時
農求青箬笠馬惜錦障泥蒼巖治裝曙幽澗褰裳暮空吟
明月篇風人渺何處

爲何大
復故里

雨夜懷韓桂舫

一雨真令節候更楚天秋氣入山城孤燈明滅淮南夕對

楊淋浪塞北情吟
蜚暗催殘夢醒賓鴻遙喚旅愁生那能
繪出圖中看叢竹幽泉迸作聲

桂舫有聽雨圖卷子

喜晴

三日潑雲墨收來一夜風嵐蒸山欲動天淨水全空人意
新晴裏田功宿雨中停車向蓮沼猶未卸殘紅

武勝關

山勢通秦嶺關臨列岫開天低鄖子國雲沒楚王臺晚水
涼侵月秋花亂繡苔三閭哀怨後最愛賈生才

晴川閣

江城如畫浣征塵愁絕梅花笛裏人芳樹影中明似鏡浴

見洲上碧如茵會聞名士題襟遍獨上高樓拍酒頻鸚鵡
能言非善策幾多文彩歎禰衡

黃鶴樓

岿巖層構俯江開江色秋澄似潑醅乍可同流惟漢水未
將擱筆礙仙才晴川自讓二千尺大別對傾三百杯共說
今朝風日好應招黃鶴再飛來

同錢雲巖編修偕嬾雲道士晚登岳陽樓

天旣滙此無邊水何爲僅生一點山一山玉盤委青豆疑
孤星落銀河翻銀河倒影見圓月恰照龍宮混瑤闕悠悠
遶古同見之孰若今宵清興發湘君縹緲迎桂旗劉郎窈

窈歌竹枝更向僊人借鐵笛岳陽樓逼天門吹

湘江竹

洞庭渺無際天末見修竹風聲動微波秋氣戛寒玉一聽
水龍吟何處仙鸞宿不傷堯女祠爲誰娟娟綠

湘山松

昔聞湘江竹今見湘山松千直寫幹密一蓋盤陰濃幾經
歲寒雪招得清秋風香草但聞氣心知此山中

晚渡湘江

良夜泛遙浦情知水有靈纓宜芳杜襲瑟怕老蛟聽見月
心逾白何人眼不青三更河漢轉冠珮看揚舲

沅水

沅水流同澧水清
養蔬多恐蕙蘭成
湘夫人枉思公子屈
左徒空弔賈生終
古離騷文一變
滿天風露月初明
南來帶得賓鴻至
譜入么絃是此聲

八月初九夜作示錢雲巖

秋清鎖院畫欄憑
鵠立青袍隔幾層
昔日苦心今日思
三條銀燭一條水
桂移湘浦如斯白
月傷文昌特地澄
欲報國恩衡鑒慎
力排苗軋勉兢兢

九日羅慎齋少卿

典

招同范叔度學使師錢雲巖編

修嶽麓寺登高

節擁皇華使筵臨翠巘隈江山逢九日懷抱向深杯宋室
數君子賈生天下才當年投賦地終古讀書臺步步凌霄
漢茫茫辨草萊雲從衡嶽織水自澧州迴孤嶂唐碑矗層
樓禹甸開芷蘭紛佩服邱隴小尊壘浸巨南溟滙天高北
斗迴有苗今格化維楚信多材從騎松間出行厨竹裏催
談經宗孔鄭聚飲得歐梅湘浦情何極京華首重回他時
編勝槩曾醉菊觴來

岳麓書院

昔人開講舍清絕麓山前都以騷爲思誰將佛結緣芷蘭
吹嶽雨橘柚點江烟渺渺浮槎去湘君抱月圓

賈長沙祠

天下才遷謫離憂湘水深
席前宣室戀傳合史家心
江月娟娟色秋風嫋嫋音
尙餘竹枝怨付與劉郎吟

又一村讌集酬姜中丞度香先生

晨

放眼秋光野趣宜連朝壇坫盛威儀
王人忝列諸侯上別墅仍勞小隊移
壘石生雲藏樂曲踈籬隔水見花枝
亦知酒美情無限歸驛兢兢使命馳

湘江禱詩

青草湖邊夜雨繁桃花江上漲新痕
青草至今滋竹色桃花何處問仙源

資蕓紛紛蘭不芳
蛾眉謠詠怨空房
信讒誰葬蛟龍窟
可但強鄰是虎狼

十二巫峯夢裏看
發情止義古來難
請觀宋玉牆東女
斑竹蕭蕭倚暮寒

宛轉含情唱竹枝
輕羅如霧晚風吹
湘夫人杳瀟湘水
孤月淒涼下九疑

湘浦

湘浦斷瑤瑟猿聲
宵月中秋心極烟
水雲夢接空濛偶
潯襄陽墨時飄杜
若風蕭蕭江上竹
淚落渚花紅

潯口題壁

又食嘉魚過武昌王程記里重驚長中宵鶴夢翔寥廓匝
月山容特老蒼使者心齋黃葉館故人家指白雲鄉翰林
蕭省

齋丈居
鄰邨

周諏敬備

清宮對淨掃欒槍種麥忙

孝感道中

俯矚盤虬百尺松九巘翹首削芙蓉山行忽訝無邊水月
下能分幾曲峯村婦收棉攜稚子枯僧鑿井半鄉農莫嫌
假館難安枕歲熟時聞午夜春

呂堰驛歌

爲王巡檢死事歌也王君名翼孫字聽夫長洲人
湖北呂堰驛巡檢嘉慶元年三月賊攻驛君殉難

失其尸後統師者獲巡檢印乃得君死事狀請

卹如例無子以其兄芑孫之子嗣廕雲騎尉

垂虹宛宛長蛇陣巡檢誓與民同命義軍夜半鑿凶門長

蛇赴壑民星奔剛大植立妬其角短兵旣接三酋斫

王君殺賊

目劉方達劉漢常山有舌罵不休自投於水戟倒鈎青燐

白骨貉一邱將軍獲賊腰銅印

帝褒授命命得正君不見梅花嶺上葬衣冠巡檢雖小完

其官呂堰叢祠香雪寒

過新鄭贈紀慕僑明府

維成

同是殷商姓應聯兄弟稱治真儕渤海詩欲續春陵晚水

清無滓秋山瘦有稜莎庭深夜話猶對讀書燈

寒色憶湘江

寒色湘江上無人知此心雪花落水盡竹淚過秋深浮世
看帆影華年感瑟音雲中君去後想像到於今

李墨莊舍人

鼎元

由絳州登岱題圖二首

人共峨嵋月飛臨泰岱巔一杯東海水九點齊州煙吳練
照顏色秦松經歲年封中雲自起七十二君湮

天下果然小平生未一登月明招鶴駕日浴想烏騰雲作
中原雨陰藏九夏水亮無封禪事豈謂彩毫能

題黃小松別駕岱巖覽古圖

子久一枝筆能將古意傳官宜訪碑使杖挂水衡錢寥落
漢唐字蒼茫齊魯煙如何懸蠟屐畫裏結因緣

題譚子受

光祐英雄兒女圖

防身寶劍倚天青花氣紫紗隔小屏投筆封侯年少事只
消癖馬易娉婷

賦罷文鴛更舞鷄短長亭北畫樓西怪他銀燭雙垂淚酒
半悲歌夜半啼

題時帆同年溪橋詩思圖

鳳城闌似水雲鄉檢韻真如聽鼓忙想見橋南幾株柳春
風駘蕩月昏黃

人傳蒙古大司成叉手溪橋百遍行
好是雨來雲攔住春
流泱泱和吟聲

戲呈劉石庵先生

半世塗鴉鬢欲斑
平生惟服謝東山
幾回欲試撥燈法
仍恐書遭批尾還

送金手山遊大梁并寄趙渭川同年

希璜

君去客梁園
方當華事繁
高雲落嵩少
細雨黯夷門
腸已如輪轉
袍真亂草痕
行行渡漳水
先見趙王孫

留別金園

尺五城南地
笙歌醉日斜
春深韋杜曲
客散竇田家
上楊

還明月填門有落花青驄都識路回首渺天涯